



Sabtu, 30 Nopember 2024

Ogen: Epesus 4:25



Nuriken Si Tuhu-tuhu



Keterbukan ras kejujuren seh kal perlu i bas mbangun hubungan si mehuli ras kerina kalak. Ula lit erbuni-buni, nutup-nutupi dengen la terbuka kerna kai pe, sabap megati i bas kinilajujuren jadi racun i bas pertemanen. Adi ibuni-buniken si apai pe pasti lit kesempatenna pepagi teridah, terbegi ntah pe tereteh. Enda me si megati terjadi i bas kegeluhen perjabun. La sitik jabu rubat erkiteken la terbuka perbulangen ntah pe ndehara man pasangenna, subuk kerna teman, duit ntah pe si deban si irahasiakenna man pasangenna. Seh maka dikune e jadi dengen tereteh maka kepercayaan e enggo bene, lanai terteki. Bage me nina belas-belas 'Kejujuran adalah landasan dalam membangun kepercayaan antara suami dan istri'. La sitik jabu sontar, sirang erkiteken lanai lit keterbukan ntah pe kejujuren i bas jabu. Lit HP perbulangen la banci inen ndehara ras sebalikna, ibahan paswordna/ikunci. Adi icubaken inen minter merawa. Bage me arah renungenta paksa enda ibabai kita gelah ula erbual, arus turiken situhuna, tengteng bahan pembelasken ntah pe ncibalken rananta i bas nuriken situhuna e. Bage me pedah ras pengajaren rasul Paulus man perpulungen Epesus, kearus nggeluh kalak si enggo itebus, enggo nggeluh si mbaru i bas Kristus. La lit sitebuni i bas kalak si enggo ersada selaku sada ringring i bas Kristus. Apai ka si enggo ersada kula i bas perjabun tentuna lanai lit si terbuni ras tertutup. Sada ras sidebanna i bas ndehara ras perbulangen arus terbuka, ituriken, ijelasken gelah duana seri pengidah ras pemetehna. Dikune lit permasalahan arus radu ras ndarami dalam pulahna alu bage la lit si la terdungi. Kalak si la nggit terus terang, muniken persoalen ntah pe si la uli banci latih akapna rukur e maka banci sakit ntah pe ndarai dalanna si sada. Bagenda me si arus si pebelin ras si jemba i bas kegeluhen jabu-jabuta kerina. Gelah malem ateta, Bahagia nggeluh i tengah jabu.